



Stručna služba općinskog vijeća i općinskog načelnika

Broj: 01/1-02-393/20.

PRIJEDLOG

Ilijaš, 26.02.2020. godine

Z A P I S N I K

sa 39. (tridesetdevete) sjednice Općinskog vijeća Ilijaš, održane dana 26.02.2020. godine, sa početkom u 10:00h.

Tridesetdevetom sjednicom Općinskog vijeća Ilijaš predsjedavala je predsjedavajuća Općinskog vijeća Ilijaš g-đa Alma Omerović.

Prisutni vijećnici:

RB.	IME I PREZIME
	SDA
1	ŠEHERZADA ĆOSIĆ
2	ANEL BUMBULOVIĆ
3	VEHID HALILOVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	FAHIR HASANOVIĆ
8	-
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	SEAD ŠEHIĆ
	SDP
15	ALAN ŠERAK
16	-
17	MIRSAD OSMANOVIĆ
	SBB-FAHRUDIN RADONČIĆ
18	AKIF BEŠLIJA
	GS
19	EDHEM HASANOVIĆ
20	ASIM MUJIĆ
	SAMOSTALNI VIJEĆNICI
21	SEMIR DIZDAREVIĆ
22	-
23	MUHAMED HANDŽIĆ
24	ALMIR ŠPIODIĆ
25	MEHO DŽINDO

Odsutni vijećnici:

1. Mirza Bektić
2. Eldar Šehić
3. Besim Gljiva

Prisutni gosti:

1. Radio Ilijaš – Nermina Durić-Kahvedžić
2. TV Vogošća
3. Mehmed Smajlović – predsjednik Savjeta MZ Mrakovo
4. Fuad Masnopita – predsjednik Savjeta MZ Lješevu
5. Samra Ramić – predstavica OSCE-a

Ostali prisutni:

1. Akif Fazlić – općinski načelnik
2. Meliha Avdibegović – pomoćnik načelnika
3. Merima Osmanović – pomoćnik načelnika
4. Nijaz Spahić – pomoćnik načelnika
5. Zdravko Barić – pomoćnik načelnika
6. Aziz Fazlić – pomoćnik načelnika
7. Nizama Mališević – pomoćnik načelnika
8. Sanja Zagorac-Jozić – pomoćnik načelnika
9. Ilda Kahriman – sekretar OV-a Ilijaš
10. Nermina Lemezan - stručni saradnik za informisanje
11. Maida Habibović – zapisničar
12. Meho Gljiva – predstavnik Službe za društene djelatnosti i poslove mjesnih zajednica

ALMA OMEROVIĆ – predsjedavajuća

Otvorila sjednicu i konstatovala da su prisutna 22 vijećnika, te da postoji kvorum za odlučivanje.

Informisala je vijećnike da je stigla pozivnica Kantona Sarajevo za obilježavanje 1.Marta – Dana nezavisnosti BiH i pozvala zainteresovane da se prijave za prisustvo na polaganju cvijeća i kompletnom programu koji je pripremljen u Kantonu.

Program je sljedeći:

Nedjelja, 01.03.2020. godine

- 09:00 sati Mezarje Kovači – Odavanje počasti i polaganje cvijeća Bosanskom Šehidu i na mezaru Prvom predsjedniku Republike BiH, gosp. Aliji Izetbegoviću
- 09:30 sati Spomen obilježje Vječna vatra – Odavanje počasti i polaganje cvijeća
- 10:00 sati Spomen obilježje ubijenoj djeci opkoljenog Sarajeva 1992.-1995.
- Odavanje počasti i polaganje cvijeća
- 10:15 sati Spomen obilježje ubijenim policajcima u Velikom parku (preko puta BBI centra) - Odavanje počasti i polaganje cvijeća (Delegacija Grada Sarajeva)
- 10:30 sati Spomen park Vraca – Odavanje počasti i polaganje cvijeća
- 11:00 sati Spomen obilježje Novi Grad – Odavanje počasti i polaganje cvijeća
- 17:30 sati Zajednička svečana akademija u Vijećnici

Na polaganje cvijeća su pozvani: članovi Predsjedništva BiH, čelnici oba doma Parlamentarne skupštine BiH i Vijeća ministara BiH, čelnici oba doma Parlamenta Federacije BiH, predsjednik i potpredsjednik Federacije BiH, članovi Vlade Federacije BiH,

funkcioneri Skupštine i Vlade Kantona Sarajevo, čelnici Gradskog vijeća i gradske uprave Sarajeva, općinskih vijeća i općina, kao i boračke i druge nevladine organizacije. Svi navedeni su pozvani i na Zajedničku svečanu akademiju koju organizuju Kanton Sarajevo, Grad Sarajevo, sve općine sa teritorije Kantona Sarajevo i Forum parlamentaraca BiH 1990.

Pozivamo Vas kao suorganizatora obilježavanja 1. marta – Dana nezavisnosti BiH da prisustvujete odavanju počasti i polaganju cvijeća prema Programu i prisustvujete Akademiji. Molimo da nam potvrdite Vaše učešće na polaganju cvijeća, odnosno dolazak na Akademiju, najkasnije u petak, 28.02.2020. godine.

Zbog velikog broja zvaničnika i ograničenog broja mjesta u Vijećnici nismo u mogućnosti pozvati sve vijećnike svih općina, pa Vas molimo da pozovete do 5 vijećnika.

Za sve dodatne informacije, molimo pozovite na e-mail sp@sp.ks.gov.ba, tel/fax 033 562-047 ili 061 557-337.

Također, u materijalima za sjednicu ste dobili pozivnicu sa programom obilježavanja Dana reintegracije općine Ilijaš i Dana nezavisnosti BiH i zvanično danas počinje program obilježavanja. Prva stavka u ovom programu je Putujuća izložba Anne Frank – Historija za sadašnjost koja će biti upriličena u Biznis centru u 12:00 h. Ukoliko budemo fleksibilni na današnjoj sjednici i završimo do 12:00 h, pozivam vas sve da odemo u Biznis centar i prisustvujemo ovoj izložbi, a ukoliko ne završimo, da napravimo pauzu u ovom periodu, pa nakon izložbe da se vratimo i nastavimo sjednicu.

Želim vas još obavijestiti da je na Kolegij OV-a stigao dopis vijećnika Asima Mujića kojim nas obavještava da je istupio iz KV GS BiH i formirao KV Asim Mujić.

Zapisnik sa 38. sjednice dala je na razmatranje.

Primjedbi na Zapisnik nije bilo, pa je OV-e jednoglasno usvojilo zapisnik sa 38. sjednice OV-a.

Zatim je predsjedavajuća pročitala predloženi dnevni red i isti dala na razmatranje.

NIZAMA MALIŠEVIĆ – pomoćnik načelnika

Kao predlagač, povlačimo tačku 6.b) broj:06/1-31-2629/19.

ALMA OMEROVIĆ – predsjedavajuća

Dobili smo i Izvještaj Komisije za statut i propise u kojem je navedeno da Komisija nije razmatrala predmetno Rješenje.

Primjedbi i prijedloga na predloženi dnevni red više nije bilo, pa je OV-e jednoglasno usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 38. sjednice
3. Izvještaj o radu općinskog načelnika i službi općine Ilijaš za 2019. godinu
4. Operativni plan općinskog načelnika i službi općine Ilijaš za 2020. godinu
5. Prijedlog Odluke o izmjenama i dopunama Odluke o povjeravanju na upravljanje i korištenje općinskih objekata za vodosnadbjevanje koji su u isključivom ili pretežnom vlasništvu općine

6. Prijedlog Rješenje iz imovinsko-pravne oblasti kojim se utvrđuje javni interes:
 - a) broj:06/1-31-2276/19
 - b) broj:06/1-31-2629/19-1
 - c) broj:06/1-31-2641/19
7. Prijedlog Rješenje o formiranju Komisije za izlaganje na javni uvid podataka premjera i katastarskog klasiranja za:
 - a) K.O. Bijamabare
 - b) K.O. Dragoradi
 - c) K.O. Srednje
 - d) K.O. Stomorine
 - e) K.O. Čevljanovići

AD-1

Vijećnička pitanja i inicijative

HALID DIZDAREVIĆ – vijećnik SDA

Inicijative:

1. Pokrećem inicijativu da se u 2020. godini pokuša obezbijediti kiosk tj. prodajno mjesto za prodaju mjesečnih karata i kupona od KJKP GRAS Sarajevo.

Obrazloženje: Na portalu ILIJAS.info je održana javna anketa sa pitanjem: Da li smatrate da je Ilijašu potrebno prodajno mjesto (kiosk) za prodaju mjesečnih karata i kupona od KJKP Gras Sarajevo?

Učestvovalo je 875 osoba koje su ostavile svoj odgovor. Rezultati ankete su javni i broj učesnika oslikava realan broj glasača. U nastavku pogledajte ankete:

ANKETA

Da li smatrate da je Ilijašu potrebno prodajno mjesto (kiosk) za prodaju mjesečnih karata i kupona od KJKP Gras Sarajevo?

DA (87%, 760 glasova)

NE (13%, 115 glasova)

Ukupno glasova: 875

Prodajno mjesto uveliko bi olakšalo kupovinu kupona svim stanovnicima Ilijaša koji koriste javni prevoz, a primorani su svoje kupone kupovati u Vogošći ili Sarajevu. Smatram da imamo dovoljno velik broj korisnika javnog prevoza da nam se obezbijedi prodajno mjesto koje bi kupone prodavalo/izdavalo nekoliko dana u mjesecu.

2. Pokrećem inicijativu prema Ministarstvu saobraćaja Kantona Sarajevo da uspostavi autobusku liniju Ilijaš-Ilidža-Ilijaš koja bi sigurno bila opravdana obzirom da veliki broj građana i studenata radi i studira upravo na navedenoj lokaciji.

Na mnogim prethodnim sjednicama smo pokretali ovu vrstu inicijative i nikada nismo dobili pozitivan odgovor. Ova linija bi uveliko olakšala odlazak građanima na Stup, Ilidžu itd. To bi bila jutarnja i popodnevna linija.

ANEL BUMBULOVIĆ – vijećnik SDA

Inicijative:

1. Pokrećem inicijativu da se u Osnovnoj školi "Podlugovi" izvrši sanacija mokrih čvorova, završi ograda školskog dvorišta, te da se izvrši rekonstrukcija i priključak rasvjetnih tijela u školskom dvorištu na javnu rasvjetu.

Obrazloženje: Na jednom od radnih sastanaka koji su u toku 2019. godine održani u OŠ "Podlugovi", a prisustvovali su direktor škole, predstavnici Vijeća roditelja, općinski načelnik i predstavnici Općinskog vijeća utvrđeni su prioritetni projekti u OŠ "Podlugovi". Neki od tih projekata su u cjelosti završeni u toku 2019. godine. U cilju ostvarivanja što boljih uslova za odgoj i obrazovanje u OŠ "Podlugovi" pokrećem gore navedenu inicijativu.

Pokrećem inicijativu prema Kantonalnoj Direkciji za ceste da se na magistralnoj cesti M-18 Tuzla-Sarajevo u Srednjem, na mjestu skretanja u naselje Moševići, izvrši postavljanje vertikalne i horizontalne signalizacije koja se odnosi na pješački prijelaz.

Obrazloženje: Mještani naseljenog mjesta Moševići, među kojim i učenici osnovnih škola, prilikom izlaska iz autobusa su prinuđeni prelaziti magistralnu cestu gdje nema označenog pješačkog prelaza. Ovakva trenutna situacija svakodnevno dovodi mještane u opasnost, te u većoj ili manjoj mjeri ometa normalno i zakonsko funkcionisanje saobraćaja na navedenoj dionici.

ALMIR ŠPIODIĆ – samostalni vijećnik

Pitanja:

1. U kojoj fazi je izdavanje urbanističke i građevinske dozole za novo mezarje u Malešićima koje je potrebno ograditi i zaštititi?

Neophodno je da se izda odobrenje za ukop umrlih i da se ovo odobri u skladu sa propisima o mezarjima, uz zahtjev koji je uputio Medžlis islamske zajednice Sarajevo prema Općini Ilijaš.

U novom mezarju, koje se nalazi u blizini pravoslavnog groblja i kapele, ukopano je do sada devet osoba, među njima i Alija Nukić koji je uvakufio 5 dunuma svoje zemlje za potrebe mezarja i džematlija Malešića.

2. Postavljam pitanje nadležnoj općinskoj Službi za prostorno uređenje i zaštitu okoliša i tražim da mi se odgovori na sva podpitanja:
 - Kada je donesena Odluka o prodaji parka za izgradnju zgrade, preko puta autobuske stanice u ulici Omladinska?
 - Da li je Regulacionim planom "Ilijaš Centar" predviđena izgradnja zgrade u parku između ulica Kakanjska i Omladinska?
 - Da li je nadležna općinska služba, koja je dozvolila gradnju, tražila mišljenje Zavoda za kulturno-historijsko i prirodno naslijeđe Kantona Sarajevo?

U Odluci o provođenju Regulacionog plana "Ilijaš Centar", koja je objavljena u "Službenim novinama Kantona Sarajevo" 30. decembar 2010. godine, broj 35., strana 36., u članu 21. pasus 5. piše "kod svih intervencija na parceli obavezno je mišljenje Zavoda za kulturno-historijsko i prirodno naslijeđe Kantona Sarajevo".

A član 22. ove Odluke govori da su objekti, u ulici Kakanjska od broja 1-3 i ulici Omladinska broj 2, 4, 6 i 8 u zoni stanovanja, volarizovani kao ambijentalna vrijednost.

Inicijative:

1. Pokrećem inicijativu da se iz Budžeta prestanu finansirati političke stranke i da se na prvom rebalansu Budžeta, sredstva od 70.000,00 KM, dodjele našim sugrađanima koji se zbog nemogućnosti liječenja u našoj državi, moraju liječiti van granica BiH.

Svjedoci smo da gotovo svaki mjesec građani provode akcije prikupljanja sredstava za liječenje naših sugrađana van granica BiH, te operacije nisu nimalo jeftine i koštaju u desetinama hiljada maraka. U većini slučajeva, ljudi kojima treba takva medicinska pomoć, nisu u mogućnosti da to sami finansiraju, jer veliki broj građana preživljava od minimalne plate i kada ih zadesi neka bolest onda moraju da pokreću razne humanitarne akcije kako bi se spasili.

2. Svjedoci smo ovih dana da se vrši revizija korisnika prava na ličnu i porodičnu invalidninu putem Službe socijalne zaštite Ilijaš. Radi se pretežno o starim i bolesnim licima. Svaki od njih dužan je, uz ostalu dokumentaciju, dostaviti Uvjerenje da li je korisnik penzije putem Federalnog zavoda za PIO. Da bi isto obezbijedili, primorani su da, lično ili putem pomoćnika, podnesu zahtjev u sjedištu Kantonalne administrativne službe u Sarajevu, te za sedam dana najmanje, moraju doći u Sarajevo, sjedište administracije PIO, kako bi preuzeli Uvjerenje. Također, reviziji podliježu svi korisnici prava po osnovu boračko-invalidske zaštite, zaštite civilnih žrtava rata, kao i korisnici zdravstvene zaštite po raznim osnovama. Svi su oni dužni najmanje jednom godišnje obezbijediti navedeno Uvjerenje. Prema mojim saznanjima, radi se o ukupno cca 2000 korisnika sa naše općine. Zbog toga, predlažem da Općinsko vijeće donese sljedeći Zaključak, obzirom da usvajanje Zaključka ne podrazumijeva dodatna finansijska sredstva iz Budžeta općine. Predlažem da se zaključak usvoji, jer nam Poslovnik tako dozvoljava.

ZAKLJUČAK

Poziva se Federacni zavod PIO, Kantonalna administrativna služba Sarajevo, da ovlasti poslovnicu u Ilijašu za izdavanje navedenog Uvjerenja, obzirom da imamo saznanja da su ispunjene sve tehničke mogućnosti.

Ukoliko problem predstavlja nepostojanje osobe koja bi bila ovlaštena za potpisivanje Uvjerenja, tražimo da se bar omogućí podnošenje zahtjeva i preuzimanje Uvjerenja u navedenoj poslovnici.

ALMA OMEROVIĆ – predsjedavajuća

Evo, prethodno smo imali inicijativu, a vezano za sredstva političkih stranaka u koje svrhe želite da se preusmjere, ali da ne naglašavamo imenom i prezimenom koliko i za koga se ta sredstva usmjeravaju. Ranije smo o tome govorili i još ću jednom zamoliti da ubuduće apsolutno ne naglašavamo za koga, koliko i ko je dao sredstva.

MEHO DŽINDO – samostalni vijećnik

Pitanje:

Postavljam pitanje Službi za privredu i finansije.

U proljeće prošle godine zasađene su sadnice u užem jezgru grada što je veoma pohvalno, jer nam zelenila nikad ne može biti dosta. Zasađene su pretežno breze, smrče, jele i pojedine vrste ukrasnog grmlja. Većina tih sadnica se nije ni primila, a tokom godine i dobar broj njih se u potpunosti osušio. Presađivanje ovih sadnica je vršilo KJKP "Park" Sarajevo koje ima djelatnost za ove poslove. Zato postavljam pitanje kolika je ovom preduzeću isplaćena naknada za ovu uslugu i da li je predviđeno Ugovorom da to preduzeće ima obavezu da ponovo zasađi sadnice na onom mjestu gdje se nalaze osušene sadnice?

AKIF BEŠLIJA – vijećnik SBB-a

Inicijative:

1. Pokrećem inicijativu prema nadležnoj općinskoj službi da se izvrši zamjena više sijalica ulične rasvjete na potezu od raskrsnice za Mrakovo, pa do Podlugova.

Obrazloženje: Radi se o tome da na donici puta od raskrsnice za Mrakovo, pa do Podlugova ne radi više sijalica ulične rasvjete, te je potrebno iste zamjeniti u što kraćem vremenskom roku s obzirom da se radi o jako frekventnoj dionici puta.

2. Pokrećem inicijativu prema općinskom načelniku da se u rebalansu Budžeta izdvoje određena finansijska sredstva i uplate za pomoć migrantima.

Obrazloženje: Svjedoci smo da se u Kantonu Sarajevo nalaze dva migrantska centra u Općini Ilidža i Hadžići, te smatram da bi bio human gest da Općina Ilijaš na čelu sa načelnikom iznađe određena finansijska sredstva i uplate za pomoć migrantima.

SEMIR DIZDAREVIĆ – samostalni vijećnik

Inicijative:

1. Pokrećem inicijativu prema Kantonalnoj javnoj ustanovi za zaštićena javna područja KS, da se stanovnici Općine Ilijaš oslobode plaćanja ulaza na Bijambare.

Obrazloženje: Budući da stanovnici Općine Ilidža ne plaćaju ulaz na Vrelo Bosne, a i Vrelo Bosne je u nadležnosti iste Kantonalne javne ustanove, ne vidim razlog da stanovnici Ilijaša plaćaju ulaz na Bijambare. Molim nadležne u KJU za zaštićena javna područja da donesu Odluku o oslobađanju plaćanja ulaza u Bijambare i na taj način stanovnike Ilijaša dovedu u ravnopravan položaj sa stanovnicima Ilidže.

2. Pokrećem inicijativu da Općina Ilijaš u okviru Budžeta za 2020. godinu iznađe sredstva, te pokrene aktivnosti i raspiše javni poziv za podršku učenicima osnovnih i srednjih škola koji ostvaruju značajnije rezultate u sportu kroz podršku i sufinansiranje članarina u klubovima, kotizacija na takmičenjima, troškova opreme i svih drugih troškova koji im se mogu stavljati na teret. U javnom pozivu predlažem definiranje sljedećih kriterija:
 - sportski rezultat (dokazivanje diplomama sa takmičenja, potvrđama i drugim relevantnim dokumentima),

- socijalni status (dokazivanje potvrdama o primanjima roditelja i drugim relevantnim dokumentima),
- visina mjesečnih troškova za sport (dokazivanje potvrdama od sportskih društava o visini mjesečnih troškova i drugim relevantnim dokumentima), te
- prebivalište (dokazivanje potvrdom o prebivalištu ili drugim relevantnim dokumentima).

Obrazloženje: Mladi sportisti u Bosni i Hercegovini su najbolji predstavnici naše zemlje i svoje lokalne zajednice u svijetu. Međutim, shodno visokim finansijskim troškovima koje imaju, često se povlače i napuštaju sport, jer oni i njihovi roditelji ne mogu snositi sve troškove koje aktivno bavljenje sportom može iziskivati od njih. Ovakva mjera koja bi im pružila podršku barem u snošenju osnovnih troškova za sport bi bila iznimno značajna, jer bi zadržala veliki broj učenika u aktivnom bavljenju sportom, pokazala im da je moguće sportom se baviti u Bosni i Hercegovini, te bila značajna mjera u borbi protiv odlaska mladih iz Bosne i Hercegovine.

ALMA OMEROVIĆ – predsjedavajuća

Pročitala je Zaključak Almira Špodića i dala na glasanje.

Općinsko vijeće je jednoglasno donijelo sljedeći

ZAKLJUČAK

Općinsko vijeće Ilijaš traži od Federalnog zavoda za penzijsko i invalidsko osiguranje, Kantonalna administrativna služba Sarajevo da donese ovlaštenje da se u poslovnicu u Ilijašu mogu izdavati Uvjerenja da li je imenovani/a korisnik penzije.

AD-2

Izveštaj o realizaciji zaključaka sa 38. sjednice

ALMA OMEROVIĆ – predsjedavajuća

Pročitala je Izveštaj o realizaciji zaključaka sa 38. sjednice i naglasila da je kod Zaključka broj 3. napravljena tehnička greška gdje je napisano da je Zaključak dostavljen Službi za prostorno uređenje i zaštitu okoliša, a trebalo je upisati da je dostavljen Službi za opću upravu, boračko-invalidsku i socijalnu zaštitu.

Izveštaj sa ispravljenom greškom dostavljen je vijećnicima na stolove.

Diskutanata po ovoj tački dnevnog reda nije bilo, pa je OV-e jednoglasno usvojilo

Izveštaj o realizaciji zaključaka sa 38. sjednice

AD-3

Izveštaj o radu općinskog načelnika i službi općine Ilijaš za 2019. godinu

AKIF FAZLIĆ – općinski načelnik

Cijenim da ste dobili dokument na osnovu kojeg možete dati svoju meritornu ocjenu o radu općinskog načelnika i službi za 2019. godinu. Naša ocjena je da je 2019. godina bila

uspješna godina za općinu Ilijaš. Realizirali smo Budžet iznad plana. Dakle, realizacija Budžeta je 17.900.000,00 KM za prošlu godinu i tako ostvaren Budžet, prije svega, je bio osnova da napravimo i realizujemo projekte koji su definisani u ovom Izvještaju. Naravno, Izvještaj podrazumijeva osnovne, ključne kapitalne projekte i aktivnosti. Puno je onih malih popratnih projekata koji, po meni, nisu ni trebali biti pobrojani kada je u pitanju ovaj Izvještaj. Kroz Izvještaj želimo da iskažemo opštu sliku aktivnosti u prošloj godini, a ona se može vidjeti iz ove dvije ključne pozicije, odnosno tri, da je Budžet realiziran iznad plana, da je realizirano 65 kapitalnih projekata u vrijednosti 8.797.000,00 KM i da je oblast društvenog života, tekućih transfera koje nekad malo i podcijenimo i ne dajemo značaj 1.891.000,00 KM. To praktično znači ovih gotovo 1.900.000,00 KM vraćenih sredstava građanima, institucijama, organizacijama, udruženjima građana, javnim ustanovama u smislu podrške realizaciji njihovim aktivnostima.

Prije svega, prokomentarisat ću ove tekuće transfere.

Transfer za učenike, studente i mlade 413.000,00 KM. To podrazumijeva stipendiranje, prevoz učenika, aktivnosti javnih ustanova iz sfere osnovnog i srednjeg obrazovanja. Transfer za socijalne programe i boračku populaciju 486.000,00 KM. Našim Budžetom, našim programima je definisana ova stavka i kroz nju pomažemo našim građanima koji su u stanju socijalne potrebe ili imaju potrebe liječenja. Dakle, humanitarne aktivnosti će uvijek biti i one trebaju da imaju prostor. One su nešto što je sastavni dio nas, naši ljudi tako da to ne trebamo nadomještavati nekim dodatnim izvorima.

Transfer za udruženja građana, neprofitnim organizacijama 729.000,00 KM, dakle, sve one organizacije iz sfere boračke populacije, sportske, kulturne i drugih udruženja i podsticajne mjere, prije svega, u sferi poljoprivrede i mali dio u sferi privrede 261.000,00 KM.

Kada su u pitanju kapitalni projekti, od tih 65 projekata, najveći dio se odnosi na saobraćajnu infrastrukturu, 36 projekata je realizirano u vrijednosti 2.740.000,00 KM, komunalna infrastruktura 2.459.000,00 KM, građenje, sanacija i rekonstrukcija objekata, imali smo takvih 7 kapitalnih projekata vrijednosti 2.701.000,00 KM. I ostali projekti, njih 7 smo izdvojili kao značajniji projekti 897.000,00 KM. Kada govorimo o objektima građenja, sanacije i rekonstrukcije objekata, prevashodno i najveći dio i finansijski i u svakom drugom smislu odnosi se na tri projekta: završetak I faze gradskog stadiona koji je cca 1.600.000,00 KM, završetak društvenog doma u Podlugovima i završetak fiskulturne sale u SŠC "Nedžad Ibrišimović" koju treba u petak zvanično da otvorimo.

Kada je u pitanju komunalna infrastruktura, najznačajniji projekat je Vrutak, a završena je I faza izgradnje vodovodnog sistema Vrutak, a ono što je ostalo je fizičko spajanje tog sistema na električnu energiju i očekujem da ćemo to vrlo brzo završiti i sistem pustiti potpuno u funkciju. Također, iz ove sfere realizirali smo projekat rekonstrukcije taložnice, dalja rekonstrukcija gradske vodovodne mreže, izgradnja kanizacionih sistema, Gornja Karaula i Malešići kao dva najveća projekta, a ove projekte smo realizirali i u Mrakovu, naselje Pavlovići, realizirali smo u Lješevu i Luci.

Kada je u pitanju saobraćajna infrastruktura, tu je bilo najviše projekata i puno je investirano. Neke smo već zaboravili, jer su završeni početkom godine, a prije svega misli se na putne pravce koji su finansirani iz sredstava OKFŠ-a, a to je asfaltiranje po 2km puta za Zenik, Korita i Dragorade. Također, završena je rekonstrukcija dijela puta kroz Željezaru 440 m, završena rekonstrukcija i modernizacija puta od firme Ilmek do podvožnjaka. Također, vidjeli ste da je po mjesnim zajednicama dio putne mreže moderniziran, da sada to ne nabrajam. Krajem prošle godine zajedno sa Direkcijom započeli smo tri značajna projekta i stvoreni su preduslovi da budu tretirani kroz Operativni plan Direkcije i Vlade Kantona iz 2019. godine da ne bi opteraćali ovaj novi Program za 2020. godinu. Dakle, to je rekonstrukcija puta u ulici Ivana Franje Jukića, dijela koji se

odnosi ispred Šipadovih zgrada ulice Hašim Spahić i rekonstrukcija, regionalna cesta do mosta u Ljubničima. Puno je bilo i drugih projekata. Prije svega, želim naglasiti projekat energetske efikasnosti koji je vodila Vlada KS na čelu sa Ministarstvom prostornog uređenja i zaštitu okoliša gdje je općina Ilijaš bila sufinansijer pet projekata (OŠ "Podlugovi", Područna škola "Gajevi", PU Ilijaš, ambulante Mrakovo i Srednje). Projekti koje je općina Ilijaš vodila sa UNDP direktno kroz projekat jačanja uloge mjesnih zajednica gdje se nabavio i namještaj za OŠ "Podlugovi", izgrađeno igralište u Salkanovom Hanu, u Srednjem, neke javne rasvjete. Kada je u pitanju javna rasvjeta kroz naš Budžet je finansirano proširenje javne rasvjete sa 135 novi rasvjetnih tijela.

To je okosnica projekata koje smo provodili. U Izvještaju imate jako dobar materijal na osnovu koga možete diskutovati, pitati i na karaju dati svoju ocjenu kada je u pitanju Izvještaj o radu općinskog načelnika i službi općine Ilijaš za 2019. godinu.

HALID DIZDAREVIĆ – vijećnik SDA

Želim da čestitam načelniku i službama na uspješnoj prethodnoj godini, a i Općinskom vijeću takođe, jer smo i mi dio ekipe koja je direktno učestvovala u realizaciji ovih projekata koji su nabrojani na 60 stranica. Još jednom čestitam i hvala.

ALMIR ŠPIODIĆ – samostalni vijećnik

Ovdje je napisano sve ono što je rađeno i što se mene tiče ja ću glasati za ovaj Izvještaj. Mogao bih ga i hvaliti i kritikovati. Sada kada kritikujemo ljudi odmah shvate kao da imate nešto lično protiv njih. Postavit ću par pitanja vezano za Službu za društvene djelatnosti i poslove mjesnih zajednica. Kada smo donosili Odluku vezano za mjesne zajednice o izboru i načinu kandidovanja, pa tamo gdje je navedeno finansiranje pisalo je da će mjesne zajednice dostavljati Izvještaje svako dva mjeseca prema Službi. U ovom Izvještaju nisam vidio da je navedeno da li su mjesne zajednice dostavljale ove svoje Izvještaje prema Službi, ima li mjesnih zajednica koje nisu dostavljale te Izvještaje na vrijeme? Drugo, do mene dolaze informacije da neki članovi Savjeta mjesnih zajednica žele da napuste Savjete mjesnih zajednica i postavljam pitanje Službi na koji način se ta procedura može provesti kada članovi Savjeta žele napustiti Savjet?

U suštini, Izvještaj organa uprave i službi se poklapa sa Izvještajem o izvršenju Budžeta općine Ilijaš. Sve što tamo piše da je realizovano, ovdje je samo malo više obrazloženo.

Imam pitanje za Službu za imovinsko-pravne poslove, s tim što ta Služba da li nema dovoljno kapaciteta ili je složen proces rješavanja imovinsko-pravnih problema i neki problemi se protežu duži niz godina kroz Službu i nisu se riješili. Jedna mjesna zajednica kaže da imaju procese koji se vode kroz imovinsko-pravnu Službu duže vrijeme i nisu riješeni.

Ovaj Izvještaj je za pohvaliti i sama realizacija sredstava u visini cca 8.700.000,00 KM je za pohvaliti.

Ne bih sada da postavljam pojedinačno po Službama pitanja i tražim dodatna obrazloženja zašto se neki projekti nisu riješili, jer znam da nije sve ni do organa uprave tako da ću glasati za ovaj Izvještaj.

ALAN ŠERAK – vijećnik SDP-a

Ja svakako neću kritikovati, samo želim, prije svega, da pohvalim administraciju općine Ilijaš na čelu sa načelnikom Akifom Fazlićem na vrijednom radu ovih proteklih godinu dana. Činjenica je da su bili preopterećeni nekim stvarima, a ono što sa zadovoljstvom

mogu konstatovati da je naša administracija poznatija u Kantonu Sarajevo kao jedna od boljih i ja vam na tome čestitam. Moramo se zahvaliti Vladi Kantona Sarajevo koja nas je pratila u protekloj godini dana izlazeći nam u susret u realizaciji određenih projekata i u ime KV SDP-a ću se svakako zahvaliti i njima i svakako i Općinskom vijeću, kao što reče kolega Dizdarević, posebno na njihovim, da kažem, inicijativama i doprinosu koji smo mi kao kolektivni organ podržavali, prije svega, rukovodstvo naše općine kako bi smo došli do ovih željenih rezultata i Izvještaj je za svaku pohvalu.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Izvještaj o radu općinskog načelnika i službi općine Ilijaš za 2019. godinu

AD-4

Operativni plan općinskog načelnika i službi općine Ilijaš za 2020. godinu

AKIF FAZLIĆ – općinski načelnik

Da ne ostanemo nedorečeni, ovo što je uvaženi vijećnik Špodić diskutirao. Znamo tu temu, ta je oblast možda više da zajedno sa Službom to pretresemo. Krenuli smo sa uozbiljavanjem rada mjesnih zajednica. To je jedan proces i želimo da nastavimo taj proces i vaša diskusija i pitanja neće ostati bez reakcija, odgovora i dogovora i da na tom planu uspješnije funkcionišu mjesne zajednice kao nešto jeste generalno dobro za artikuliranje interesa građana na području naše lokalne zajednice.

Kada je u pitanju Operativni plan, siguran sam da ste ga svi detaljno pročitali. Prije svega, mene je rukovodilo nešto što jeste temelj i koji se bazira da smo u mogućnosti da nemamo prepreka da realizujemo projekte koji su ovdje navedeni. Tih prepreka uvijek ima: da li ima Regulacionih planova, da li ima projektne dokumentacije, jesu li imovinski odnosi riješeni, kako stojimo sa finansijskim sredstvima? I to je jedan od temelja koji me rukovodio da predložim Općinskom vijeću ovakav Operativni plan. Naravno, drugi je ono što nas veže jeste naša Strategija razvoja od 2018.-2022. godine i ona je okosnica ovih temeljnih projekata koji daju tu srž našem djelovanju. Treći jeste, ovo što je već neko kazao, Budžet kroz koji smo dali osnovne definicije i konture za ovakav Operativni plan gdje taksativno nabrajamo ove projekte. Također, moram kazati da sam ja i lično radio puno sa mjesnim zajednicama gdje su dolazile inicijative, da su inicijative Vijeća u čitavom ovom zadnjem periodu bile predmet ovoga, da su bile predmet i javna rasprava po Budžetu za 2020. godinu i ono što bih vas zamolio i želio da u tom pravcu idemo, jeste da zaista podržite ovakav Operativni plan, a da sve inicijative, imali smo ih već na prvoj tački danas, biće sigurno i novih, pojaviće se mogućnosti dodatnih finansiranja, budu osnova i predmet za dopunu ili rebalans ovog Operativnog plana koji bi mogli organizirati možda za dva mjeseca. To je moj prijedlog metodološkog rada i usvajanja ovog Operativnog plana i želim da dobijemo dokument koji je zaista interes svih građana, a naravno kroz to i interes svih vijećnika u ovom Vijeću. Osnova Operativnog plana jeste 81 kapitalni projekat. Opet smo ih malo reducirali, projekte saobraćajne infrastrukture smo tretirali tako da je jedna mjesna zajednica praktično jedan projekat, a ima po mjesnim zajednicama po nekoliko pravaca. Ono što je težište i što jesu veliki projekti i Budžetom su već definisani jeste II faza izgradnje gradskog stadiona, nekoliko važnih projekata opet iz sfere obrazovanja, a radi se i već je u toku realizacija projekta rekonstrukcije stare sale u OŠ "Hašim Spahić" i nabavka opreme za produženi boravak, već obezbjeđena sredstva za rekonstrukciju i stvaranje kapaciteta za proširenje našeg vrtića, projekti koji se tiču energetske efikasnosti i to

projekti koje je aktuelna Vlada usvojila kao listu prioriteta za ovu godinu, a koje će takođe opština Ilijaš podržati kroz sufinansiranje. Dakle, to je energetska efikasnost za SŠC "Nedžad Ibrišimović", tri područne škole: Lješevo, Ljubnići i Malešići i mi smo kroz Budžet tretirali školu u Dragoradima. Ono što želim posebno naglasiti da ćemo i u ovoj godini temeljito praviti pripreme za realizaciju budućih projekata koji će doći na red u 2021. i narednim godinama. Dakle, posvetićemo se izradi investiciono-teničke dokumentacije, projektne dokumentacije i ovdje sam stavio kao prioritet 5 ili 6 najznačajnijih projekata, a ima ih dosta i to ste vidjeli u dijelu koji tretira projektovanje. Znači, nešto što jeste dugoročno važno jeste da izradimo proširenje projekta kanalizacije u mjesnoj zajednici Kamenica, da uradimo idejni i glavni projekat rješavanja, odnosno tretmana otpadnih voda u Mjesnoj zajednici Gajevi kako bi, prije svega, zaštitili izvorište Vratak, jeste idejni i glavni projekat vodosnadbijevanja Mjesne zajednice Ljubina iz sistema Sokoline. Nakon niza godina nekih istražnih radova sve nas je to opet uputilo i vratilo i tom ćemo sa strukom definisati da se Mjesna zajednica Ljubina, po meni, s aspekta vodosnadbijevanja vjerovatno najugroženija, može jedino dugoročno i kvalitetno riješiti kroz ovaj sistem vodovoda Sokolina, dakle produženje primarnog voda od Srednjeg ka Ljubini. Također projekti puteva, rekonstrukcija puta u Mjesnoj zajednici Ljubnići od mosta do mezarja u Ljubničima, rekonstrukcija ili rehabilitacija puta od Mlina do Misoče, također završetak investiciono-tehničke dokumentacije kada je u pitanju podhodnik u Mjesnoj zajednici Podlugovi i kada je u pitanju podzemna garaža u Ilijašu. Također, puno posla i puno važnog posla i u ovoj godini sigurno će se desiti kada je u pitanju donošenje nove prostorno-planske dokumentacije. Znači da smo donijeli Odluke o pokretanju izrada određenog broja Regulacionih planova, ali ja očekujem da će u ovoj godini zaista na red doći najznačajniji, kada je u pitanju prostorno planiranje, a to je izrada i donošenje urbanističkog plana za urbano područje općine Ilijaš i da će to biti ključna tačka koja će definisati sve ono što je bitno za održivost razvoja naše općine. Evo toliko, da ne nabrajam sve ostale projekte, jer ste to već vidjeli.

ALAN ŠERAK – vijećnik SDP-a

Imam jedno pitanje, a tiče se puteva pod rednim brojem 3. tačka 2. Rehabilitacija dijela ulice Hašima Spahića (Šipadove zgrade) 315 m. Da li se ovo odnosi na kružni tok iz 2019. godine ili je to nastavak?

AKIF FAZLIĆ – općinski načelnik

Odnosi se na taj iz 2019. godine.

ALAN ŠERAK – vijećnik SDP-a

Dakle, to je ono za što smo već dobili sredstva u 2019. godini. Koliko sam upoznat radi se rekonstrukcija tog dijela, a ne rehabilitacija. Je li tako?

AKIF FAZLIĆ – općinski načelnik

Pojmovi rekonstrukcije i rehabilitacije su vrlo blizu u smislu tehničkih uslova izvođenja. Izbor između rehabilitacije i rekonstrukcije je praktično izbor u mogućnosti odabira kada su u pitanju javne nabavke. Dakle, rehabilitacija bi podrazumijevala da je Direkcija mogla koristiti priliku da već izabrane firme uvede na taj posao. Međutim, bez obzira što smo mi željeli takvu varijantu i zbog toga smo to stavili kao rehabilitacija i projektno je definisano

kao rahabilitacija. Direkcija je dakle opet išla na javne nabavke i znate za tu ulicu i cestu u Ljubničima je proveden javni postupak i izabrana firma "Halilović" Ilijaš i KJP "Rad" kao dva izvođača na ova dva pravca.

ALAN ŠERAK – vijećnik SDP-a

Dakle, onda je ovo višak u Operativnom planu za 2020. godinu. Ono što me zanima je zašton nismo krenuli u rekonstrukciju ulice Hašima Spahića u skladu sa dogovorom, jer smo dogovorili da ćemo je raditi. U ovoj godini I faza do apoteke, a iduće godine da je spojimo sa ulicom Bosanski put. Paralelno s tim da idemo na korekciju iz oblasti prostornog planiranja - Regulacioni plan i da uvrstimo biciklističku stazu. To je bio zvanični dogovor. U ovom Operativnom planu ja to ne vidim.

MIRSAD OSMANOVIĆ – vijećnik SDP-a

Načelnice, ja u Operativnom planu ne vidim završetak ulice Ivana Franje Jukića najstarije ulice u Ilijašu.

Nije sporno šta piše i u jenom i drugom dokumentu. Sporno je posebno u niskogradnji pravimo "pempas" puteve. Ko prati u zadnjih deset godina šta smo uradili i bolje je da neki putevni nisu ni urađeni, jer su bili kvalitetnije prije nego što su urađeni. Reći ću načelniku, prije par mjeseci je asfaltirana ulica i sve se diglo, a niko nije reagovao. Nažalost, ja sam do skoro mislio da gdje god je "kapitalac" iz SDA da se radi kvalitetno, međutim, asfalt se digao iznad kuće predsjednika OO SDA. Znači "ne pita" se ni SDA. Mislim da je bolje uraditi pola puteva kvalitetno. Bili smo na terenu, vidjeli smo, ali imat ćemo mišljenje građana, kakav je odnos pojedinih izvođača prema građanima, a posebno prema poslu koji rade iako je ovdje navedeno ko su izvođači, ko radi, ko je nadzor. Zamolio bih vas i strah me da će Ilijaš doći u nezgodnu situaciju, jer je postala alarmantna izgradnja "pempas" puteva tj. puteva za jednokratnu upotrebu. Danas pravio put, a za dva dana se asfalt digao. Ja sam vidio da iz asfalta trava raste. To je problem. Bolje je da duplo manje ulažemo, ali da kada uradimo put da ga završimo kako treba. Sa pomoćnikom načelnika Azizom sam razgovarao, iznio sam mu mišljenje građana i najvjerovatnije i on to zna, ali neka načelnik i svi ostali izađu na ovaj put koji je nedavno asfaltiran, a već se digao. To je bruka i sramota. Da li mi radimo puteve zbog izvođača da bi zaradio ili zbog građana? Nastojim da ne pričam puno i zato sam bio izašao iz sale da ne slušam o ova dva dokumenta. Nama nije problem novac ni ovo što je načelnik napisao, nego je problem kvalitet. Tu ćemo "pasti". Mi smo jedna od rijetkih općina koja toliko ulaže u infrastrukturu, ali ulažemo, tvrdim odgovorno, bespotrebno za rekonstrukcije.

RASIM ŠEHIĆ – vijećnik SDA

Da ne bude kurtoazno da hvalim Plan. Pohvalit ćemo ga svi najvjerovatnije prilikom glasanja tako da ćemo iskazati da smo vjerovano 95% zadovoljni ovim Planom. Želio bih da iskoristim priliku da pohvalim način na koji su načelnik zajedno sa Službama kreirali ovaj Plan gdje su iznašli vremena i načina da prime sve Savjete mjesnih zajednica, da saslušaju sve njihove prijedloge i planove o to je za svaku pohvalu, a sami Plan ćemo pohvaliti tako što ćemo ga podržati.

ALMIR ŠPIODIĆ – samostalni vijećnik

Kako sam u Vijeću od 2016. godine navikao sam da Operativni plan načelnika bude vrlo

precizno razrađen i vrlo često sam sa svojim prijedlozima učestvovao u davanju prijedloga za Operativni plan. Mislim da su ovo važni dokumenti i ono što se predvidi Operativnim planom to je nešto što se treba i ispoštovati. Operativni plan, kao i svaki do sad Operativni plan načelnika je za pohvalu. Mi možemo tražiti neke detalje koji su propušteni ovim Planom i sigurno možemo naći neke primjedbe. Evo ja nalazim projekte iz 2017. i 2018. godine koji se provlače i vjerovatno su neki drugi problemi tehničke prirode, pa nisu realizovani, ja imam par pitanja zbog nejasnoća i zbog javnosti, građana obzirom da sam pokretao inicijative, ne iz moje glave, nego od građana. Sve ono što kažem na Vijeću, inicijative, pitanja, prijedloge, donosim od građana, jer smatram da oni plaćaju na kraju krajevo ovo što danas radimo.

Prvo pitanje izgradnja saobraćajnice Vratuša I faza – šta podrazumijeva I faza? Ovaj put smo spominjali 2017. i 2018. godine i koliko znam da je rađen projekat i drago mi je zbog toga što se neće raditi onako po nekom predračunu radova, već po projektu kako je i najbolje.

Ilijaš Grad – pitanje i inicijativa koje sam postavljao, mislim prošle godine, a vezano za Kadariće (rješavanje kanalizacije za Gornje Kadariće i snadbijevanje vodom). Da li je predviđeno negdje, a ja nisam primjetio u Operativnom planu i da li je riješen taj problem?

Mjesna zajednica Gajevi – za pohvaliti je ulaganje u Donjem Selu 1 km i 200 m asfalta, s tim da imam primjedbe građana iz Donjeg Sela da nisu obuhvaćene sve ulice i svi sokaci, odnosno javni putevi. Misli da to načelnik može i dopuniti, a radi se o putu dužine cca 50 m. Kad se već ulaže u 1 km i 200 m, mislim da ne bi trebao biti problem ni ovih 50 m da na kraju budu svi zadovoljni. Zamolio bih vas načelniče da to prihvatite.

Vanjsko uređenje Doma Podlugovi – šta podrazumijeva? Da li je to nabavka mobilijara, golova, koša i ocrtavanja terena za plohu koju smo uradili ili je nešto drugo?

Ja sam pokretao inicijativu vezano za asfaltiranje puta prema repetitoru u dužini 200 m. Taj put smo 2018. godine nasipali. Nasipanje puta od 250 m koštalo je, po Izvještaju o realizaciji Budžeta za 2018. godinu, 6.500,00 KM. Mislim da ga nije isplativo više nasipati, a put je oštećen. Ako bude prostora, kroz Rebalans bi trebalo pokušati ugraditi ovaj put i uraditi ga.

Pitanja koja se provlače kroz Operativni plan načelnika su svakako unapređenje web stranice. Pokretao sam i to pitanje i inicijativu. Isto ima u Operativnom planu za 2018. i 2019 godinu i nadam se da će se to ove godine i realizovati.

Ono što bih predložio na ovako bogat i obiman Operativni plan jeste da bi trebalo pojačati nadzor nad svim izvođačima radova i treba na neki način sankcionisati neurađene dobro poslove od strane izvođača radova.

MUHAMED HANDŽIĆ – samostalni vijećnik

Ne bih uzeo ni ovih par minuta koliko ću reći, nego jednostavno ne mogu da prepoznam ovo "lijevo krilo" kolega vijećnika na ovoj strani obzirom da znaju da je i izborna godina, a nemaju komentara na Operativni plan načelnika kako je to bila praksa u nekim prethodnim godinama. Tako da, ne mogu vas prepoznati od tolike hvale na račun načelnika i njegovog Operativnog plana i Izvještaja koji je već podnesen. Složit ću se i ja da je taj Plan dobar, međutim, mi ako ne znamo za bolje, onda nam je dobro i ovo što imamo. To bi bila krajnja konstatacija, a što ovo govorim, iz razloga što evo maloprije je rekao kolega Šerak da je administracija općine Ilijaš jedna od vodećih u Kantonu Sarajevo i hvala Bogu da je tako i da smo se pokrenuli da idemo malo naprijed. Međutim, dobro bi bilo da odemo i u druge općine da vidimo dokle su oni u ovome svemu stigli. Primjera radi, općina Centar, Novo Sarajevo ili Ilidža koje grade sada kulturne, sportske centre, nama je samo san da dođemo do tog nivoa u narednoj deceniji ili stoljeću, ovim tempom kako

idemo. Kroz naše prijedloge za Budžet, ja sam jednom prilikom naveo igralište za djecu u Bioči da se uradi školsko igralište i ono nije uvršteno ni u Budžet, niti Operativni plan. Vjerovatno neko pretpostavlja da će te škole nestati nekada. To su pretpostavke onih koji su najodgovorniji za to. Dok se rade trim staze, igraonice za pse po centru, to mi možemo samo sanjati i evo ne možemo uraditi igralište za tjelesni odgoj djeci u Bioči. Da li je to neko namjerno uradio da "osakati" i ono malo stanovnika što je ostalo u Bioči, odnosno njihove djece, a ovo je tipičan primjer "sakaćenja" djeca ako nemaju prostor za igru ili jednostavno taj dio dođe na "rep" nekih događaja. To bi bila konstatacija na ono što sam rekao maloprije, ako ne znamo za bolje, dobro nam je i ovo što imamo.

Kad se tiče ovog Operativnog plana načelnika, ovdje je sve navedeno i uglavnom to su sve projekti koje smo mi delegirali, svi vijećnici ovdje zajedno sa Službama kroz prijedloge koje smo dali i vidim da su kolege u većini zadovoljne što znači da je bilo prostora da se sve njihove želje ispune, pa u tom smislu i neke od mojih prijedloga i želja koje sam dao. Međutim, ima jedna stavka za koju me interesuje kako ćemo raditi, a to je sanacija i uređenje spomen obilježja i šehidskih mezarja na općini Ilijaš ako već znamo da postoji javno preduzeće Fond memorijala koje treba o ovome da brine. Po meni, možda bi trebali sufinansirati dio sredstava za održavanje naših mezarja i spomenika i da imamo koordinatora koji će to prezentovati da to preduzeće koje se već bavi tim poslovima da to radi i na općini Ilijaš, a ne samo za Bajram kada mi dođemo na šehidsko mezarje u Ilijaš Stari ili neko drugo i da ono bude zaraslo u travu, paprat ili ne znam već šta. Dalje, postavljanje tabli sa nazivima i numeracijama. Ovo je pitanje već tri godine na Operativnom planu i u Budžetu planirano. Pretpostavljam da je problem što bi ljudi sada željeli da mijenjaju nazive ulica, sokaka itd. i ne mogu da se usaglase. Pretpostavljam da je to problem, pa se do sada nije obilježilo. Ja sam obišao čitav Kanton Sarajevo, sva naselja i ulice, sticajem okolnosti sam u jednoj komisiji, i jedina smo mi općina koja nije numerisala svoje stambene jedinice u lokalnoj zajednici. Dajte da to uradimo, a manite se prijedloga i imamo mi želja da se ulica zove po ovo ili onom, ali dajte da numerišemo ovo postojeće i da damo nazive takvi kakvi jesu. Nikada nećemo doći do rješenja ako budemo ispunjavali želje sviju nas. Načelnik je rekao da se svake godine uradi po jedan projekat po mjesnim zajednicama i slažem se s tim, a čini mi se da ćete ove godine trebati da uradite dva gore kod nas, jer zajednica iz koje dolazim prošle godine niste uradili niti jedan i nadam se da će načelnik to imati u vidu i da će uvažiti da se to uradi. Još jedno, koliko znam planirali ste da spomen obilježje šehidima u Bioči bude gotovo do dana šehida, a to je 31. maj, cijenim da, ovdje kako je navedeno II i III kvartal, nećemo stići to uraditi. Ako je ikako moguće gledajte da se to riješi na vrijeme.

ALEN HASKOVIĆ – zamjenik predsjedavajućeg

Operativni plan općinskog načelnika i službi općine Ilijaš je odličan pokazatelj na koji način će se vršiti realizacija Budžeta u 2020. godini i koji su to projekti koji će se realizovati u tekućoj godini. Zaista je pohvalan rad načelnika sa Savjetima, jer oni najbolje znaju potrebe lokalne zajednice i najbolje znaju delegirati projekte lokalnih zajednica, poredati prioritete u tim lokalnim zajednicama i u konačnici imamo te prijedloge u ovom Operativnom planu koji nije napravljen juče, nego se pravi kroz čitavu 2019. godinu. Sve pohvale upućujem načelniku i općinskim službama na ovako detaljno izrađenom Operativnom planu i planiranje izrade projekata i uslova za projekte koji nas čekaju u 2021. godini, jer na određeni način smo trasirali put kojim ćemo ići dalje u 2021. godini kroz Operativni plan ove godine.

Prvo, ovo što je Mirsad Osmanović govorio, moj odgovor je da je transparentnost. U Izvještaju smo sve napisali ko je radio, kako je radio, kako su zaključeni ugovori, pošto je šta bilo, ko je bio nadzor. Vidjeli ste da je u osnovi bio nadzor Zavod za izgradnju Kantona Sarajevo i IG Banja Luka koja je na javnom pozivu/tenderu prošao kao nadzor. To je nešto što proceduralno mi ne možemo mijenjati. Ono za šta se opštine bore, bore se da što više obima realizacije projekata nadzor bude Zavod za izgradnju Kantona Sarajevo, mada je i on poprilično izbirokratizirana institucija, ali ipak u njihov "pečat" više vjerujem. Također, mislim da neke anomalije kojih ima ne trebaju sada daju neki ton kako se sve loše radi. Mi možemo sve ove projekte izanalizirati i identificirati tamo gdje ima problema, na nekima i ima i onda možemo vidjeti taj odnos.

Uvaženi vijećnik Alan Šerak – ovdje javno kažem da jeste bilo moje obećanje i prijedlog za Operativni plan daljnja rekonstrukcija ulice Hašima Spahića - nismo to uvrstili, jer sam i u uvodom izlaganju kazao da ne želim da nešto uvrstim zašto nemamo sve pretpostavke da bi išli u realizaciju tog projekta, a ovdje je, prije svega, pretpostavka izmjena Regulacionog plana Centar. To znate da nam treba godina i kada to pokrenemo trebat ćemo još neke stvari mijenjati, a naravno krot to ide projektovanje. Hoću da kažem da trebamo napraviti dobru pripremu za realizaciju ovog projekta i zaista staviti u prvi prioritet i po svemu onome što jeste, ta ulica zasluđuje da bude prvi prioritet u našim aktivnostima kada su u pitanju kapitalni projekti.

Ovdje bilo najviše pitanja koje je postavio vijećnik Almir Špiodić. Projekat Vratuša I faza znači da će se u ovoj godini potpuo realizirati rekonstrukcija saobraćajnice koja podrazumijeva dvije trake, pješačku stazu i koja podrazumijeva rješavanje fekalne i oborinske odvodnje, I faza – mi to zovemo od raskrsnice gdje je kuća vijećnika Mujića do ovog preloma gore to je 440 m, a mi smo tender raspisali, odnosno pokrenuli postupak raspisivanja tendera kao okvirnog sporazuma na dvije godine za cijelu dionicu. Dakle, cijeli ovaj spoj do puta za Mrakovo. U ovoj godini, mislim da smo zaokružili finansijsku konstrukciju, da imamo urađenu ovu polovinu puta i da imamo završene sve procedure u idućoj godini za nastavak realizacije tog puta.

Pitanje za Kadariće – ja mislim da je to taj put mislim da se zove pumpna stanica 120 m i on je stavljen u Operativni plan.

Pitanje putnih pravaca koji su definisani za Mjesnu zajednicu Gajevi, vidjeli ste da je tu analitički baš raščlanjeno skroz, a prije svega, u želji da se uvaži generalno i direktni zahtjevi građana, ne samo institucija. Znam za ovaj slučaj i ovaj problem i taj problem kada je u pitanju tih, mislim 40 m, Služba već na neki način tretira i imamo još neke vrste zahtjeva kada je u pitanju Mjesna zajednica Gajevi i želimo gore da napravimo neku dobru atmosferu u smislu realizacije projekata i da se gore građani "okupe" oko tih projekata.

Vanjsko uređenje Doma Podlugovi podrazumijeva da uredimo vanjski dio – sve što treba urediti a kroz ovu zajedničku stavku 77.000,00 KM – sportska igrališta, ćemo nabaviti osnovnu-elementarnu infrastrukturu za to sportsko igralište.

Ova inicijativa ostaje kao inicijativa prema repetitoru; web stranica je uvrštena.

Kada je u pitanju nadzor, ja sam već na neki način objasnio. Dakle, zvanični nadzori su naš Zavod za izgradnju Kantona Sarajevo i još uvijek firma kojoj nije istekao ugovor, a to je IG Banja Luka. Mislim da će oni u ovoj godini dio sredstava, kako je to Ugovorom definisano, iscrpiti i onda ćemo ići u novi tender za ugovaranje nadzora. Ono što bih ja želio kada je nadzor u pitanju, jeste direktni sporazum tj. izabrati nadzor direktno, ali kada uđete u to, onda se uvijek može spočitati netransparentnost, a pogotovo izbog nadzora direktno od strane načelnika koji će dakle njega slušati. Dakle, ja to ne mogu, ne želim i nadzor će se uvijek birati javnim pozivom. Javni poziv podrazumijeva da se oni zaista

takmiče do tako niskih nivoa sredstava što uvijek ugrožava njihov kvalitetan rad. Diskusije koje je imao uvaženi vijećnik Handžić, uvijek mi možemo spočitati da negdje nešto nije urađeno, ali ako generalno gledamo ja mislim da je u svakoj mjesnoj zajednici sigurno urađeno više onoga što se tretira našim planskim dokumentima, nego ono što nije urađeno, pa prema tome evo i ovo kada je u pitanju dječije igralište. Pitanje održavanje šehidskih mezarja pomoćnik Nijaz može dati detaljnije informacije. Tretirana su naša šehidska mezarja koja su vezana za javnu ustanovu koja vrši to i imamo ova šehidska mezarja koja mi na neki način održavamo. U zadnje 2-3 godine, svake godine u proljeće mi to pregledamo, sačinimo predmjer u smislu njihove sanacije. Juče sam dobio, za mene, moralno ponižavajuće pismo i slike od ovog Zavoda sa mezarja šehidskog u Starom Ilijašu. To pismo ću uputiti i džematu Stari Ilijaš. One slike pokazuju sve o našem odnosu, nemojmo gledati institucije, prema tim mezarjima. Adresni registar jeste i moja slaba tačka i moja davna želja da je što prije realiziramo. Ovo što ste vi kazali da imaju numeracije u cijelom Kantonu, pa imaju numeracije, ali stare. Naš adresni registar podrazumijeva praktično novu numeraciju i ono što je skoro završila općina Hadžići, mi smo mislili da ćemo doći u poziciju da ovo možemo ranije realizirati, ali ovi svi poslovi oko usaglašavanja katastra i zemljišne knjige oko ove harmonizacije su nas doveli da do danas još uvijek nismo to postavili, a želimo dakle to postaviti. Kad tako usaglašena parcela, objekat ili nešto slično nađe svoje svoje mjesto u gruntu i dobije taj broj koji će dobiti kroz potvrdu i napiše se, to će onda biti pravi Adresni registar, vi pritisnete taj broj i ulicu i on vas vodi na sve što je na tome i zbog toga mislim da, evo možda i nije ni loše što smo izgubili neko vrijeme da ovo realizujemo na ovakav način. Ja cijenim, onako kako je to meni Služba iznijela, da zaista u prvoj polovini godine možemo pokrenuti ovaj proces i krenuti u fizičko obilježavanje ovih svih objekata. Spomen obilježje – to smo Budžeto zaokružili. Dobili smo i od Kantona 15.000,00 KM i imamo u našem Budžetu, projekat imamo, plan javnih nabavki smo donijeli i mislim da možda u narednim mjesec, mjesec i po dana da ćemo uspjeti izabrati izvođača i možda stignemo sa ovim rokom koji bi željeli da na dan obilježavanja u Bioči bude to završeno, ali sigurno će biti u punom jeku realizacija tog projekta.

ALAN ŠERAK – vijećnik SDP-a

Što se tiče Adresnog registra, općina Hadžići su nedavno implementirali taj projekat i saznanja koja ja imam to je "pun pogodak" upravo iz razloga elektronske evidencije i ostalih stvari, a uveliko ćemo olakšati našoj privredi imajući u vidu koje sve probleme ljudi imaju upravo zbog nepostojanja numeracije određenih objekata i ulica na području općine Ilijaš.

Druga stvar, ja se nadam da će te konačno tom prilikom postaviti tablu na Trg ispred JU KSC-a, jer vam je to obaveza koju još niste uradili, a za kraj neću reći da obećate, ali da javno kažete da će te se potruditi po pitanju ulice Hašima Spahić da napravimo te administrativno-tehničke uslove/pretpostavke da iduće godine možemo krenuti u realizaciju te ulice.

MIRSAD OSMANOVIĆ – vijećnik SDP-a

Načelnik mi nije odgovorio vezano za ulicu Ivana Franje Jukića.

AKIF FAZLIĆ – općinski načelnik

Evo upisana je na strani 3. tačka 4.

MIRSAD OSMANOVIĆ – vijećnik SDP-a

Brine me načelnikova diskusija kada je u pitanju nadzor i izvođače radova, a evo iz kojih razloga. Gospoda oko načelnika dobro zna kako se rade projekti i zna se koja je odgovornost izvođača radova, a koja je odgovornost nadzora. Postoje reklamacije, penali itd. Ono što je dobro rekao je da treba snimiti situaciju i ja bih volio da situaciju snime stručne osobe, bar u zadnjih nekoliko godina puteve koji su urađeni. Ne može iznad nas koji finansiramo, biti nadzor i izvođač radova. Ne može biti. Moramo jednom "po nosu udariti" izvođača radova da se uozbilje i da oni drugi vide, da ponovo urade, a to imamo prostora u Ilijašu 2-3 dionice gdje možemo sigurno dostaviti reklamaciju i natjerati izvođača da ponovo uradi kako treba. Ako je korumpiran nadzor i njih treba "udariti". To je naša zakonska obaveza, jer mi moramo štiti taj novac, moramo štiti građane. Nije sporan tekst Programa, nego je sporan kvalitet ovog što treba da se uradi.

AKIF FAZLIĆ – općinski načelnik

Kada je u pitanju ulica Hašima Spahića ja sam u svom obrazlaganju i obrazloženju kazao da je to zaista prioritet najprioritetniji i ona ostaje prioritet. I ako je to neka vrsta obećanja za svoj angažman da se ispune preduslovi za realizaciju tog projekta, ja ga i zvanično dajem.

Kada je u pitanju Adresni registar, zaista lijepo je ovo u Hadžićima. Međutim, moramo znati da su opština Hadžići, Trnovo i Visoko imali sreću da budu pilot projekat prije rata i da imaju praktično završen katastar, uređen i usklađen sa zemljišnom knjigom i oni su praktično došli na gotovu stvar koju sada samo ažuriraju i mogli su brže realizirati ovaj projekat. Mi tek trebamo da ta ažuriranja završimo, da ispunimo te pretpostavke za Adresni registar. Ovo nije neko pravdanje, nego zaista govorim o objektivnim činjenicama da bi se nešto realiziralo koje sve procese i procedure moramo učiniti.

ALMA OMEROVIĆ – predsjedavajuća

Vezano za diskusiju kolege Osmanovića, u potpunosti se slažemo s svim ovim što ste kazali i ako smatrate da ima potrebe da na Kolegij dostavimo jedan dopis i održimo tematsku sjednicu, da identifikujemo sve probleme koje imamo na terenu ako mi, kao Vijeće, možemo da doprinesemo ovoj temi i da prosljedimo Službi šta je to što mi predlažemo i želimo da se desi na terenu, pored indetifikacije na terenu šta očekujemo da se dalje poduzme ukoliko nismo zadovoljni onim što se izvodi na terenu. Znamo da naše Službe nisu odgovorne za taj dio, ali na neki način tu smo da se dogovaramo i da vidimo šta nam je najbolje rješenje.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Operativni plan općinskog načelnika i službi općine Ilijaš za 2020. godinu

AD-5

Prijedlog Odluke o izmjenama i dopunama Odluke o povjeravanju na upravljanje i korištenje općinskih objekata za vodosnadbjevanje koji su u isključivom ili pretežnom vlasništvu općine

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Odluku o izmjenama i dopunama Odluke o povjeravanju na upravljanje i korištenje općinskih objekata za vodosnadbjevanje koji su u isključivom ili pretežnom vlasništvu općine

AD-6

Prijedlog Rješenje iz imovinsko-pravne oblasti kojim se utvrđuje javni interes:

- a) broj:06/1-31-2276/19
- b) broj:06/1-31-2629/19-1
- c) broj:06/1-31-2641/19

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Rješenja iz imovinsko-pravne oblasti kojim se utvrđuje javni interes:

- a) broj:06/1-31-2276/19
- b) broj:06/1-31-2629/19-1
- c) broj:06/1-31-2641/19

AD-7

Prijedlog Rješenje o formiranju Komisije za izlaganje na javni uvid podataka premjera i katastarskog klasiranja za:

- a) K.O. Bijamabare
- b) K.O. Dragoradi
- c) K.O. Srednje
- d) K.O. Stomorine
- e) K.O. Čevljanovići

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Rješenje o formiranju Komisije za izlaganje na javni uvid podataka premjera i katastarskog klasiranja za:

- a) K.O. Bijamabare
- b) K.O. Dragoradi
- c) K.O. Srednje
- d) K.O. Stomorine
- e) K.O. Čevljanovići

Nakon što je iscrpljen dnevni red, predsjedavajuća Alma Omerović zaključila je tridesetdevetu sjednicu OV-a Ilijaš u 11:40 h.

Zapisničar:
Maida Habibović

PREDSJEDAVAJUĆA
OPĆINSKOG VIJEĆA ILIJAŠ

Alma Omerović, BA nov.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
certifikat:CRO20794Q

